

## Rapport dalla sessiun dil cussegl da vischnaunca dils 21-01-2013

### Tractanda 1

### Approbaziun dil protocol dalla sessiun dils 11-12-2012

Il protocol dalla sessiun dils 11-12-2012 vegn approbaus en votaziun unanima cun engraziament.

### Tractanda 2

### Informaziun “Preproject Ovra Zavragia”

A caschun dalla seduta dils 2 da matg 2011 ha il cussegl da vischnaunca giu concediu in credit da frs. 80'000.00 per schar elaborar in preproject per ina Ovra hidraulica Zavragia. La suprastanza communal ha sin fundament da quella decisiun surdau al biro d'inschignier Walter Deplazes l'incarica da luvrar ora in giavischau preproject.

Donat Nay informescha che la suprastanza hagi gest questa sera priu enconuschientscha dallas informaziuns dil preproject sco quei ch'il cussegl vegni informaus. Ord quei motiv sappi il cussegl buca spetgar gia questa sera ina posiziun dalla suprastanza en caussa. La suprastanza vegni a prender posiziun per mauns dil cussegl suenter haver fatg la necessaria evaluaziun.

Inschignier Walter Deplazes presenta il preproject ed informescha il cussegl detagliadamein davart las lavurs fatgas entras siu biro els suandonts cavazzins:

- Ordinaziuns digl ambient (Leschas cantunalas e federalas)
- Survesta dil project
- Tschaffada Zavragia
- Lingia da pressiun
- Centrala a Zignau
- Cuosts da baghegiar
- Produenziun d'energia e rentabilitad
- Valetaziun

Sco punct principal san ins constatar ch'ina realisaziun fuss ord motivs tecnicos e geologics pusseivla.

Ils cuosts per ina realisaziun dil project ein denton aults e quei surtut muort la liunga lingia da pressiun.

La tschaffada en Val Zavragia ei praticamein pusseivla da construir mo en in sulet liug e quei sin territori da Trun e Sursaissa.

Per saver decider schebein il project duei vegnir persequitau ni buc sto aunc vegnir sclariu plirs puncts essenziali. Quei duei succeder entras ina valetaziun che vegn fatga entras la suprastanza communal cun agid dil biro d'inschignier. Suenter quella valetaziun ei previu ina nova informaziun dil cussegl da vischnaunca.

## **Tractanda 2**

### **Project da meglieraziun Schlans** **Reglament surdada da parcellas da meglieraziun** **Reglament da principis per la repartiziun dils cuosts**

Ils 13 d'ost 1999 ha la populaziun da Schlans decidiu la meglieraziun funsila sin il territori dalla entira anteriura vischnaunca da Schlans. Sin proposta dalla suprastanza communal da Trun ha igl uffeci cantunal da meglieraziun e mesiraziun decidiu il 5 d'october 2001 l'engrondaziun dil perimeter dalla vischnaunca da Schlans sin il territori da Trun che sesanfla denter la Val Farbertg ed ils cunfins dalla anteriura vischnaunca da Schlans e vischnaunca da Breil/Brigels.

Igl onn 2006 ei vegniu entschiet cun la construcziun dallas empremas vias da meglieraziun. Dapi igl onn 2006 entochen la fin digl onn 2012 ein diversas vias vegnidas construidas. Essend ch'igl entir project ei progredius fetg bein eis ei ussa necessari d'elaborar il reglament da principis per la repartiziun dils cuosts ed era il reglament davart las surdadas dallas parcellas dalla meglieraziun generala Schlans entras la cumissiun da meglieraziun.

Sco quei che Conrad Derungs informescha il cussegl vegn tier la repartiziun dil territori sin ils proprietaris il terren vegl reducius per ca. 10% . Quei terren vegn duvraus per la construcziun dallas vias. Plinavon ha la meglieraziun cumprau terren da divers proprietaris. Quei terren han ins saviu duvraus per l'ulivaziun interna da terren. Ussa dat ei 15 parcellas ch'ei en possess dalla meglieraziun. Quellas parcellas han ina sufatscha da ca. 4.7 hectaras ed ina valur da biabein frs. 50'000.00.

Per saver vender quellas parcellas basegna ei in reglament corrispudent.

Suenter che tut las vias ein construidas ed ils cuosts dalla entira meglieraziun ein avon maun ein ils cuosts restonts da reparter sin ils possessurs da terren. Per saver far quella repartiziun basegna la cumissiun da meglieraziun il reglament davart principis per la repartiziun dils cuosts.

La cumissiun da meglieraziun ha deliberau a caschun dalla seduta dils 19 d'october 2012 ils dus reglaments necessaris e propona al parlament communal d'approbar els.

**Suenter haver repassau ils artechels dils dus reglaments approbescha il cussegl da vischnaunca il reglament surdada da parcellas da meglieraziun ed il reglament principis per la repartiziun dils cuosts en votaziun unanima.**

## **Tractanda 4**

### **Revisiun parziala dil reglament da salarisaziun**

Il reglament actual da salarisaziun dalla vischnaunca da Trun ei vegnius approbaus dil cussegl da vischnaunca il 24-06-2002 ed ei ius en vigor cun il 1-01-2003.

Ils 18-09-2012 ha il cussegl elegiu ina cumissiun predeliberonta e surdau a quella cumissiun l'incarica per la revisiun parziala dil regulativ da salarisaziun.

La cumissiun ha terminau la lavur el decuors dil meins da december 2012 e surdau la proposta alla suprastanza communal per examinaziun. La suprastanza communal ha proponiu da far entginas amplificaziuns e quellas ein vegnidas approbadas dalla cumissiun predeliberonta. Ils divers alzaments da tariffas vegnan ad effectuar expensas supplementaras da ca. frs. 23'000.00. Quels cuosts ein denton gia cuntenu el preventiv digl onn 2013.

Il cussegl da vischnaunca repassa ils artechels nua ch'igl ei previu midadas e fa discussiun ed ina pintga midada.

**Cun 10 : 1 vusch approbescha il cussegl da vischnaunca la revisiun parziala dil regulativ da salarisaziun cun vigur naven dils 01-01-2013.**

**Tractanda 6**

**Pusseivladad da tschentar damondas**

Dalla pusseivladad da tschentar damondas vegn fatg diever.

**Per il cussegl da vischnaunca**

Il president  
Flurin Decurtins

Igl actuar  
Plazi Decurtins